



露螺

雨一下落久，四界有塗肉的所在攏咧積水，閒時藏甲無看見影的露螺、軟蜆，一隻一隻對塗跤總趨出來見人。個攏欲揣較懸、較焦袂予水共駐死的壁頂、樹樑、石頭空佻竹篙尾去覷。溫室咧種菜的尼龍網仔平坦、好爬、通風閣袂含水，才是濟甲會驚人。

論真講，烏銼烏銼閣滯滯、軟軟的露螺，干焦看就強欲起雞母皮，連我都驚甲毋敢去磕伊。註死毋死有一工我去雞牢仔巡水、囤飼料的時陣，佇圍籬內無張持踏破一粒露螺。都猶未共番麥角倒入去飼料槽仔內底，孤孤是「pòk」一聲爾，規陣雞豚仔攏三伐做兩伐從倚來跤邊，啄彼塊碎糊糊的露螺肉，三兩輾手就無看見身屍去矣。我才知影若佻飼料來比並，雞仔顛倒較興這味，毋過愛先共有砢砢的外殼撼予破，個才啄會著內底的肉。

這聲雞豚仔有食福矣，若無推甲哽哇兼折舌，我死都毋信。對園仔頭巡到園仔尾，祛規袋重 khuâinn-khuâinn 的露螺囤露螺孫，差不多兩百捅粒彼跤兜，我刁工穿靴管揸來到雞牢仔前，才伸手共門揀開爾。是毋是個攏食了知滋味，規陣怙越的總圍來跤邊，目睭掠透明的塑膠袋仔矚矚看，敢若誠哈的款。我共袋仔喙捎倒頭栽，砢砢砢砢輾落來塗跤的時陣，我嘛同齊伸跤那越那蹇。雞仔驚袂赴通食，攏無咧斟酌是毋是會予靴管蹋著，親像飢荒按呢從來從去搶甲咯咯叫。扯勻來算一隻食八粒，遐爾仔細的雞哇一聲就溘矣，較加我揸暗頓的番麥角入去的時陣，個攏無彼款枵嘎嘎的架勢，嘛無拈倚來跤邊纏袂煞。

雞仔上驚沃著雨，毛若拍澹會隨寒著，較傷重的凡勢會曲去。熱人較捷咧落的西北雨攏落袂久，一下仔就出日矣，對雞仔來講顛倒無敗害。毋過風雨若像孝男按呢落袂煞，個無法度出去筯塗沙、揣蟲多，就攏攏做一伙映燒爾，嘛揣無啥物齣頭通變。拄塘閩雨縫的時陣，我就去祛露螺轉來，予個有腥臊通做點心，猶較值 tiáp-á。

作者：藍春瑞

☆詞彙學習☆

【駐死】tū-sí：溺斃

【滯滯】siûnn-siûnn：黏滑的狀態

【雞母皮】ke-bú-phuê：雞皮疙瘩

【磕】kháp：碰

【註死毋死】tsù-sí-m̄-sí：不巧

【番麥角】huan-béh-kak：碎玉米粒

【雞豚仔】ke-thûn-á：即將發育成熟的雞

【三兩輾手】sann-n̄ng-liàn-tshiú：三兩下子

【冇砢砢】tīng-khok-khok：食物太硬

【撼】hám：敲打

【食福】tsiáh-hok：口福；享受美食的運氣

【推】thui：大吃；快速的吃。

【哽哇】kén-kui：堵在喉嚨不易下嚥。

【重 khuâinn-khuâinn】：非常重

【靴管】hia-kóng：雨鞋。

【哈】hah：渴望得到

【砢砢砢砢】khih-khih-khòk-khòk：嘈雜的撞擊聲。

【蹋】lap：用腳踩踏。

【雞哇】ke-kui：雞的嗉囊。

【枵嘎嘎】iau-sà-sà：非常餓的樣子

【孝男】hàu-lâm：哭個不停的喪家子女

【映燒】kheh-sio：擠在一起互相取暖

【較值 tiáp-á】kha tit-tiáp-á：差堪告慰